

Sulisunik avataaneersunik atorfinitsitsiniarnernut qinnuteqaatit kommunenit suliarineqartillugit, qinnuteqaatit kommuneni suliffissaqartitsiniarnernut ataatsimiititaliani tusarniaassutigineqartalernissaat qulakkeerniarlugu UKA 2012-imi Naalakkersuisut maleruagassioqqullugit Inatsisartut aalajangiiffigisassaattut siunnersuut. Ataatsimiititaliat qanoq katitigaassanersut aammalu sulinerat pillugu Naalakkersuisut aamma maleruagassalioqquneqarput. (Inuit Ataqtigiit Inatsisartuni ilaasortaataat)

Akissuteqaat

(Inuussutissarsiornernut Aatsitassanullu Naalakkersuisoq)

Siullermeerneqarnera

Naalakkersuisut siunnersuummut qujassuteqarput tassalu Sulisunik avataaneersunik atorfinitsitsiniarnernut qinnuteqaatit kommunenit suliarineqartillugit, qinnuteqaatit kommuneni suliffissaqartitsiniarnernut ataatsimiititaliani tusarniaassutigineqartalernissaat qulakkeerniarlugu UKA 2012-imi Naalakkersuisut maleruagassioqqullugit Inatsisartut aalajangiiffigisassaattut siunnersuut, ataatsimiititaliat qanoq katitigaassanersut aammalu sulinerat pillugu Naalakkersuisut aamma maleruagassalioqquneqarput.

Kommunalbestyrelsit ataatsimiititalianik ataavartunik pilersitsisartuupput, taakkulu katitigaanerat oqartussaassuseqarnerallu aqutsinissamut ileqqoreqqusami aalajangersarneqartarlutik. Kommuninut inatsisitigut pisussaaffiuvoq aningaasaqarnermut ataatsimititalianik pilersitsinissaq, taassumali saniatigut kommuninut namminneq aalajangiigassaasarpoq ataatsimiititalianik sorlernik kissaateqarnerlutik, takuuk Kommunit aqunneqarnerat pillugu Inatsisartut inatsisaanni nr. 22, 18. november 2010-imeersumi kapitel 4-imi aalajangersakkat. Inuussutissarsiornernut Suliffeqarnermullu Naalakkersuisoqarfiup kommunalbestyrelsit ataasiakkaat peqqusinnaanngilai ataavartunik ataatsimiititalianik pilersitseqqullugit imaluunniit ataatsimiititaliap katitigaanera sulineralu pillugit malittarisassioqqullugit.

Maannakkut inatsisitigut malittarisassaqareerpoq sulisussanik avataaneersunik atorfinitsitsinernut malittarisassartaqareersunik. Kalaallit Nunaanni suliffissarsiortut killilersimaarnissaat pillugu Inatsisartut inatsisaata nr. 27, 30.oktober 1992-imeersumi malittarisassat naapertorlugit Naalakkersuisut piginnaatitaapput sulisussanik avataaneersunik akuersissuteqarfigineqarnissamik qinnuteqaatinik tunniussisarneq, suliarinnittarneq aamma nalunaaruteqartarneq pillugit sukumiinerusunik malittarisassiortarnissamut.

Taamatut piginnaatitsissut piviusunnngortinneqarsimavoq Kalaallit Nunaanni suliffissarsiortut killilersimaarnissaat pillugu Namminersornerullutik Oqartussat nalunaarutaanni nr. 24, 26. august 1993-imeersumi. Nalunaarut malittarisassanik peqqissaartunik imaqarpoq, qanoq iliorluni pineqartumi suliat suliarineqartarnissaannut tunngasunik. Assersuutigalugu sulisitsisumit sulisussanik avataaneersunik atorfinitsitsinissamut atuinissamulluunniit akuersissummik qinnuteqaat

kommunalbestyrelsimut suliffissarsiuussisarnermik allaffik aqqutigalugu immersugassaq immikkut ittoq atorlugu qinnuteqaatigineqartartussaavoq. Suliffeqarfiup taaguutaa, najugaa, sulerisuunera aamma sulisitsisutut normua pillugit eqqortunik paasissutissat saniatigut immersugassaq atorfiup nassuiaataanik aamma atorfirmut qinnuteqaammut ilaatinneqartumut imarisaata nassuiaataanik paassissussanik immersorneqassaaq. Piginnaasatigut piumasaqaatit nalunaarutigineqarsimassapput ilanngullugu paasissutissartalerlugu, qanoq iliorluni atorfik inuttassarsiorneqaraluarsimanersoq kalaallimit sulisinnaasumit. Sulisitsisoq kalaallimit sulisinnaasumit qinnuteqaammut itigartitsisimappat qinnuteqaammi itigartitsinermut patsisaasoq pillugu imaqaassaaq.

Sulisitsisumit piginnaasatigut piumasaqaatigineqartut atorfiup imarisavianut naapertuutissapput ilinniagaqarsimanikkullu pineqartumi nalinginnaasumik piumasaqaatigineqartartunit qaffasinnerusumik piumasaqaataassanatik. Sulisinnaasunik avataaneersunik atorfinitsitsinissamut atuinissamulluunniit akuersissummik qinnuteqaammik suliffissarsiuussisarfiup pissarsinermini misissussavaa atorfirmut kalaallimik piginnaanilimmik sulisinnaasumik imaluunniit Kalaallit Nunaannut immikkut atuumassutilimmik innersuussisoqarsinnaanersoq.

Nalunaarut malittarisassartaqarpoq, tassalu suliffissarsiuussisarfiup akuersissutinik qinnuteqaatit tunniussinerillu nalunaarsortassagai, kiisalu sulisinnaasut atorfininneri soraarnerilu nalunaarutigisassallugit. Ilanngullugu suliffissarsiuussisarfik naatsorsuusiortassaaq sulisinnaasunik avataaneersunik akuersissutinik qinnuteqaatit pillugit naatsorsuinerillu Inuussutissarsiornermut Suliffeqarnermullu Naalakkersuisoqarfimmu nalunaarutigisassallugit.

Inuussutissarsiornermut Suliffeqarnermullu Naalakkersuisoqarfiup naliliineraa sulisinnaasunik avataaneersunik qinnuteqaatit suliarineqartarnissaannut peqqissaartunik malittarisassaqaareersoq. Kommunit inatsisip nalunaarutillu imarisaanik eqquutsitsisassappata pisariaqarpoq, pineqartumi isumaginnissinnaasunik ataatsimiititaliamik allaffeqarfimmillu peqarnissaat, ataatsimiititaliarli suliffissarsiuussisarnermut ataatsimiititaliaminngarnit allaanerulluinnartunik taaguteqartinneqarsinnaavoq.

Siunnersuut akuerineqassappat kommunit aqunneqarnerat pillugu inatsimmut allannguutissamik siunnersuusiortoqartariaqassaaq allamilluunniit pisinnaatitsissummik pilersitsisoqartariaqassaaq.

Siunnersuut piviusunngortinneqassappat kommunit namminneq aqutsisinnaassusiannik attuisussaamat Naalakkersuisunut pingaarluinnarpoq inatsimmik allannguinnissamut suliniarnermi kommunit akuulluinnartinneqarnissaat.

Allannguutissatut saqqummiunneqartut Naalakkersuisut tungaviatigut tapersorsorpaat, taamaattorli innersuussutigissallugu aappassaaneerineqarnissaa ukiaanerani ataatsimiinnissamut kinguartinneqassasoq, taamaalillugu atuumassuteqartut peqataatinneqalerlutillu tusarniaavigineqarsinnaaniassammata. Taamaalioortoqarpat Naalakkersuisut periarfissaqalissammata nalunaarusiornissamut siunnersuutip sukumiinerusunik suliarinissaanut toqqammavissamik. Nalunaarusiaq taama isikkulik siunnersuutip aappasaanik suliarineqalersinnagu Inatsisartunut saqqummiunneqarsinnaassaaq.

Naalakkersuisut innersuussutigaat siunnersuut aappassaaneerineqassasoq, ilutigisaanillu siulittaasoqarfimmu qinnutigissallugu aappassaaneerineq ukiakkut ataatsimiinnissamut

kinguartinneqassasoq.